



Excmo. Concello de Tui

FESTA DO MIÑO 2018

Bases de Participación e de Información da VIII Festa Gastronómica

Sábado 18 de agosto de 2018 de 20:00h a 00:00h – Rúa Lugo



PRIMEIRA

ORGANIZACIÓN

O Excmo. Concello de Tui, a través da súa Concellería de Ensino e Cultura, organiza a VIII Festa Gastronómica, que se realizará dentro do marco de actividades da Festa do Miño 2018 na Cidade de Tui, co obxectivo de regular e crear un marco legal para a celebración desta Festa Gastronómica, xa tradicional e con éxito de participación en edicións anteriores, coa convocatoria de 13 postos dobres de venda directa para a promoción do produto natural, autóctono e artesá; así como a dinamización do día da Festa do Miño no centro da cidade e Centro Comercial Aberto.

A organización comunica a cada asociación participante que:

- Facilitará o seguinte material de produción: 2 postos de venda, 2 taboleiros + 6 cabaletes (para degustación do produto en fronte aos postos), 2 contedores de lixo (1.200kg de capacidade), 2 valos, 2 tomas de corrente de 2.200w, así como 3 tomas de auga para todos en conxunto.
 - o O inicio da montaxe será a partires das 10:00h e a recollida de 00:30h a 01:30h, coa colaboración de dúas persoas por cada asociación participante.
 - o Os participantes accederán á Rúa Lugo cun vehículo ata ás 19:00h, por rúa Mondoñedo, onde terán reservado estacionamento para un vehículo (acreditación).
 - o Cada asociación participante aportará un voluntario para o control de acceso á zona gastronómica e información ao usuario e participante da festa.
- Non dotará aos postos de infraestrutura en caso de inclemencias meteorolóxicas adversas.
- Editará publicidade precisa da festa para a difusión e promoción da mesma.
- O Concello dotará a rúa Lugo dun equipo de son ambiente, así como de dous sanitarios para uso dos asistentes.
- Correspóndelle ao Concello designar o emprazamento dos postos na rúa Lugo, así como asignar cada un deles a cada asociación participante.
- Non se responsabilizará das modificacións que poidan producirse por causas alleas ou de forza maior na celebración desta festa.
- Declina nos participantes calquera responsabilidade sobre a calidade, composición e elaboración ou prezo dos produtos á venda.
- Non permitirá a venda ambulante no recinto ou asentamento de calquera tipo de posto non autorizado.

SEGUNDA

DATA, HORARIO E EMPRAZAMENTO

A Festa Gastronómica celebrarase o sábado 18 de agosto, en horario de 20:00h a 00:00h, na Rúa Lugo (en caso de suspensión celebrarase o domingo 20 de agosto).

TERCEIRA

NORMATIVA SANITARIA

As persoas que manipulan alimentos precisan levar un vestiario adecuado e en perfectas condicións hixiénicas. Ademais, deberán levar o pelo atado e a cabeza cuberta cun gorro ou complemento similar. Todos os vendedores de alimentos deberán estar en posesión do Carné de Manipulador de Alimentos. Non está permitido que o persoal que se encargue dos cobros manipule tamén os alimentos. Queda terminantemente prohibida a venda de alcohol a menores, sendo o participante o responsable único e exclusivo de cumprir esta condición. Os produtos á venda deberán ser naturais, autóctonos e elaborados artesanalmente. As tortillas, empanadas, etc., deberán estar moi feitas, e facerse o mesmo día. Os doces deberán facerse a última hora antes da venda. Os produtos que se usen en calquera das comidas, deberán ser mercados en establecementos autorizados, garantindo a calidade e hixiene. Os produtos alimenticios expostos, deberán estar en recipientes apropiados. Colocarase carteis ben visibles que indiquen que non se poden tocar. Deben vixiarse os alimentos que precisen ser servidos en frío evitando todos os riscos para a saúde. Toda bebida deberá ser etiquetada. Permitirase a venda de auga, refrescos, cervexa e viño. Todos os artigos, aparellos e equipamentos deben ser mantidos limpos e en bo estado de conservación.

CUARTA

POSTOS

Fóra dos postos non se permitirá almacenar caixas ou vultos. Non se poderá aumentar a superficie de venda do posto con mesas ou plataformas adicionais. Todos os carteis informativos, de prezos e rótulos estarán redactados en galego. Na fronte do posto colocaranse dous carteis co nome da asociación e parroquia representada, se fose o caso. A listaxe de prezos deberá estar á vista, e non se poderá alterar no transcurso da celebración. Todo posto deberá permanecer aberto durante o horario de celebración da feira. Cada participante é responsable da limpeza e da seguridade interna do seu posto. Non se pode deixar lixo no lugar que ocuparon. Deberase deixar no mesmo estado de limpeza no que se atopaba previo á montaxe. Os postos terán que cubrir o chan para evitar manchas de graxa, aceites ou similares. Cada participante deberá obrigatoriamente ter dúas persoas encargadas da limpeza dos taboleiros de degustación situados en fronte o seu posto, así como do espazo de uso frontal de usuarios. Queda prohibido facer lume en todo o emprazamento da festa. É obrigatorio contar cun extintor de 6 kg por participante. Quedan prohibidos os aparellos reprodutores de música, altofalantes, ou calquera outro que emita son de animación.

QUINTA

PARTICIPACIÓN

Existe un límite de prazas, só poderán participar ás 13 primeiras asociacións culturais de Tui inscritas. (Deberán estar inscritas no rexistro municipal de asociacións). O Concello notificará a cada asociación participante a súa aceptación de inscrición final cunha semana de antelación. A participación na Festa implica a íntegra aceptación destas bases.

SEXTA

TAXAS

Previamente as asociacións solicitantes deberán aboar as correspondentes taxas no departamento de Tesourería, segundo a "Ordenanza por ocupación de postos situados en terreos de uso público local", que no punto 1.1, di que por ocupación con postos de venda ambulante en zonas de dominio público, esixiranse 1,49 € por metro cadrado, valorando a organización que a ocupación por participante será de 10m², a taxa correspondente será de 14,90 € por participante.

SÉTIMA

INSCRICIÓN

O prazo de inscrición será o mércores 1, xoves 2 e venres 3 de agosto, por rexistro de entrada, en horario de 09:00h a 14:00h, en modelo normalizado. No momento de formalizar a inscrición é obrigatoria a presentación da seguinte documentación, senón non será admitida a solicitude:

- Copia do C.I.F da asociación participante.
- Copia do nomeamento da xunta directiva no libro de actas da asociación.
- Copia do D.N.I do presidente da asociación.
- Copia dos diplomas ou certificados de manipuladores de alimentos por cada membro participante de cada asociación.
- Carta de produtos a venda e prezos dos mesmos.

OITAVA

COMUNICACIÓN

Estas Bases serán oficiais no momento da aprobación por Decreto de Alcaldía e publicadas na páxina web www.concellotui.org, e difundidas a través da Radio Municipal de Tui e nos diferentes medios de comunicación, e estarán a disposición da cidadanía no taboleiro de información no Concello de Tui e no Departamento de Cultura, xunto ao modelo de inscrición normalizado para este fin.